

CARMEN XCVIII

XCVIII

IN te, si in quemquam, dici pote, putide Victi,  
id quod uerbosis dicitur et fatuis.  
ista cum lingua, si usus ueniat tibi, possis  
culos et crepidas lingere carpatinas.  
si nos omnino uis omnes perdere, Victi, 5  
hiscas: omnino quod cupis efficies.

XCIX

SURRIPVI tibi, dum ludis, mellite Iuuenti,  
suauiolum dulci dulcius ambrosia.  
uerum id non impune tuli: namque amplius horam  
suffixum in summa me memini esse cruce,  
dum tibi me purgo nec possum fletibus ullis 5  
tantillum uestrae demere saeuitiae.  
nam simul id factum est, multis diluta labella  
guttis abstersisti omnibus articulis,  
ne quicquam nostro contractum ex ore maneret,  
tamquam commictae spurca saliuua lupae. 10  
praeterea infesto miserum me tradere amori  
non cessasti omnique excruciare modo,  
ut mi ex ambrosia mutatum iam foret illud  
suauiolum tristi tristius elleboro.  
quam quoniam poenam misero proponis amori, 15  
numquam iam posthac basia surripiam.